

## Morning Dogri (NSD) Bulletin 01-02-2026

### आकाशवाणी

- खजाना मंत्री निर्मला सीतारमण अज्ज लोकसभा च 2026-27 लेई केंद्री बजट पेश करडन।
- प्रधानमंत्री नरेंद्र मोदी होर संत गुरू रविदास हुं'दी 649मीं जयंती दे मौके पर अज्ज पंजाब दा दौरा करडन।
- भारत ते अरब देशें, पच्छिम एशिया च न्याऽसंगत, व्यापक ते टिकाऊ शांति लेई अपनी बचनबद्धता दी इक बारी परतियै तस्दीक कीती ऐ।
- भारती तट रक्षक बल अज्ज अपनी स्थापना दी 50मीं ब'रेगंड मना करदा ऐ।
- भारत नै 5 टी-20 क्रिकेट मैचें दी श्रृंखला दे 5में ते अखीरले मैच च न्यूजीलैंड गी 46 रन्जें कन्नै हराइयै श्रृंखला 4-1 कन्नै अपने नांऽ करी लैती ऐ।

<><><><><><>

### N-Budget

खजाना मंत्री निर्मला सीतारमण अज्ज लोकसभा च माली ब'रे 2026-27 आहला केंद्री बजट पेश करडन। बजट पेश होने दे मगरा एह्दी प्रति राज्यसभा दे पटल पर रखी जाह्ग। नरेंद्र मोदी सरकार दे त्रीये कार्यकाल दा एह् त्रीया बजट होग। बजट तैयार होने शा पैहले वित्त मंत्री होरें माहिरें दे अर्थ शास्त्रियें, बपार संगठनें, शिक्षा ते सेहत खेत्तर, भलेआं लौह्के, लौह्के ते दरम्याने उद्यमें, बपार ते पूंजी बजार दे प्रतिनिधियें सने कई हितधारकें कन्नै बचार-बटांधरे आहली बैठकां लाइयां।

केंद्री राई-बाई मंत्री शिवराज सिंह चौहान होरें बी राईबाई ते ग्रामीण विकास कन्नै सरबंधत बक्ख-बक्ख पहलुएं दे बारे च बजट शा पैहले व्यापक परामर्श कीता ते सुझाएं दी संकलित रिपोर्ट खजाना मंत्री होरें गी सौंपी।



## PM-Punjab

“संत गुरु रविदास जी” हंडी 649मीं जयंति दे मौके पर प्रधानमंत्री नरेन्द्र मोदी होर अज्ज पंजाब दा दौरा करगंन। ओ आदमपुर ब्हाई अड्डे दा बी दौरा करगंन- जित्थे इस ब्हाई अड्डे दा नां बदलियै नमां नां आदमपुर “श्री गुरु रविदास जी” ब्हाई अड्डा रखगंन। प्रधानमंत्री हुदें दफ्तर नै जानकारी दिती ऐ जे आदमपुर ब्हाई अड्डे दा नां बदलियै आदमपुर श्री गुरु रविदास ब्हाई अड्डा करना “श्री गुरु रविदास”- जेहडे जे इक महानसंत ते समाज सुधारक हे- उन्दे प्रति सम्मान गी दर्शादा ऐ। श्री गुरु रविदास जी दी समाजी बरोबरी- गरीबें ते कमजोरें प्रति दया ते हमदर्दी दे हर इक मनुक्ख दे आत्म-सम्मान दियां सिक्खेयां- भारत दे समाजी मुल्यें-कदरें गी सदा थमां प्रेरत करदियां न। प्रधानमंत्री होर लुधियाना दे हलवारा ब्हाई अड्डे पर टर्मिनल भवन दा बी उदघाटन करगंन। एह टर्मिनल भवन राज्य लेई इक नमां प्रवेश द्वार स्थापित करोग- जेहडा लुधियाना ते एहदे आहले –दोआले दे औद्योगिक ते राई-बाई क्षेत्रें दियें जरुरतें गी बी पूरा करोग। हलवारा च भारतीय ब्हाई फौज दा रणनीतिक लिहाज कन्नै बडा महत्वपूर्ण स्टेशन बी ऐ। पैहले लुधियाना दे पराने ब्हाई अड्डे दा रनवे एहदे मुकाबले लौहका हा- जेहडा छडा लोहकें अकार दे ब्हाई ज्हाजें लेई माफक हा। ब्हाई सम्पर्क च सुधार ते बड्डे ज्हाजें दी उत्थे आओ-जाई समयोजित करने लेई- हलवारा च इक नमां नागरिक एन्कलेव विकसित कीता गया ऐ- जेहदा रणवे शैल लम्मा ऐ ते ए-320 जनेह ज्हाजें दा बी इत्थे उतरना ते डोआरी भरना मुमकिन होई सकदा ऐ।

प्रधानमंत्री होर “संत गुरु रविदास जी” जी हुंदे सम्मान च इक सार्वजनिक समारोह च बी हिस्सा लैगंन ते शरदांजलि अर्पत करने लेई डेरा सचखंड बल्लन बी जागंन।

<><><><><><>

### Declaration-India Arab

भारत ते अरब देशें अंतर्राष्ट्री कनून, संयुक्त राष्ट्र दे प्रासंगिक प्रस्ताऽ ते अरब शांति पैहल दे मताबक पच्छम एशिया च न्याऽसंगत, व्यापक ते टिकाऊ शांति लेई अपनी बचनबद्धता दी इक बारी परतियै तस्दीक कीती ऐ। बदेश मंत्री डॉ. सुब्रह्मण्यम जयशंकर होरें अरब देशें दे बदेश मंत्रिणं ते अरब लीग दे महासचिव हुंदे कन्नै कल नमीं दिल्ली च भारत अरब बदेश मंत्रिणं दी दुई बैठक च भागीदारी कीती। इस बैठक च इक संप्रभु, स्वतंत्र ते 1967 दी सीमा पर आधारत इक बवहारिक फिलीस्तीन दा आह्वान कीता गोआ। एह्दे कन्नै गै इजराइल दे कन्नै बी शांति बनाई रखने दी मंग कीती गेई। दौनें पक्खें, फिलीस्तीन दे लोकें दे अधिकारें दा समर्थन बी कीता ऐ।

<><><><><><>

### Indian Coast Guard

भारती तट रक्षक बल अज्ज अपनी स्थापना दी 50मीं बरे गंड मना करदा ऐ। एहू बल तकरीबन 5 दहाकें दे राष्ट्र दे प्रति समर्पण ते निस्वार्थ सेवा दा प्रतीक ऐ। सन 1977 च छडे 7 पोल दे कन्नै शुरू होए दा भारती तट रक्षक बल अज्ज 155 पोत ते 80 ज्हाजें आली इक बड्डी समुंदरी ताकत दे रूप च विकसित होई गेदा ऐ।

एह बल ब'रे 2030 तगर 200 पोत ते 100 ज्हाजें दे अपने लक्ष्य गी हासल करनेदी दिशा च अगड़ा बधा करदा ऐ।

<><><><><><>

## Waqf Properties

सरकार नै वक्फ सम्पतियें दे प्रबंधन गी पारदर्शी ते जवाबदेह बनाने लेई “उम्मीद पोर्टल”पर सर्वेक्षण मॉड्यूल ते वक्फ सम्पति पट्टा मॉड्यूल शुरु कीता ऐ। अल्पसंख्यक मामले सरबंधि मंत्रालय नै जानकारी दिती ऐ जे सर्वेक्षण मॉड्यूल पोर्टल पर वक्फ सम्पतियें दे सर्वेक्षण सरबंधि जानकारी गी कठेरने ते संजोइयै रखने लेई डिजिटल ढांचा उपलब्ध करांदा ऐ। वक्फ सम्पति पट्टा प्रबंधन मॉड्यूल गी वक्फ सम्पतियें दी पट्टा सरबंधी जानकारी दे पूरे-पराते प्रबंधन गी सैहल सखल्ला बनाने दे मकसद कन्नै शुरु कीता गया ऐ। एह मॉड्यूल पट्टा जानकारी- अवधि यानि पट्टे दी मयाद- रकम ते होर दुए जरुरी ब्यौरे गी बवस्था आहले ते पारदर्शी ढंगै नै दर्ज करने ते निगरानी करने च सक्षम बनांदा ऐ। अल्पसंख्यक मामले दे सचिव डाक्टर चन्द्रशेखर कुमार होरें सभनें राज्यें ते केन्द्र शासत प्रदेशें दे वक्फ बोर्डें गी मॉड्यूल दे संचालन गी यकीनी बनाने लेई ते हितधारकें च जागरुकता बधाने लेई प्रोत्साहित कीता ऐ।

<><><><><><>

## Special Train

खराब मौसम करी सिडक दे ब्हाई ट्रैफिक च पेदे विघ्न करी प्रभावित मुसाफरें दी सौख आस्तै उत्तरी रेलवे नै श्री माता वैष्णो देवी कटड़ा ते श्रीनगर बश्कार कल इक विशेष आरक्षित रेल गड़ी चलाई।

आकाशवाणी जम्मू दे संवाददाता दी रिपोर्ट मुजब इस चाली दी इक दे मगरा ए त्री रेल सेवा ऐ। इस्सै चाली दी रेल सेवा 27 ते 28 जनवरी गी बी चलाई गई ही- जेदा लोकें पूरा फायदा ठोआया। जम्मू दे सीनियर कर्मशियल मैनेजर उचित सिंगल होरें आखेया जे ए विशेष आरक्षित रेल गड्डी इक बारी परतियै मुसाफरें दी मंगै पर चलाई जा गई ऐ- कीजे सड़क ते ब्हाई सेवाएं च रुकावट आवा रदी ही। कल्लै आडर गै एदे शा पैहले चलाई गेदियां विशेष रेलगड्डियां मुसाफरें कन्नै पूरी चाली भरोई दियां गेइयां हियां।

<><><><><><>

### Cricket

भारत नै 5 टी-20 क्रिकेट मैचें दी श्रृंखला दे 5में ते अखीरले मैच च न्यूजीलैंड गी 46 रन्जें कन्नै हराइयै श्रृंखला 4-1 कन्नै अपने नांऽ करी लैती ऐ। तिरुवंतपुरम च कल राती भारत नै पैहले बल्लेबाजी करदे होई तय 20एं ओवरें च 5 विकटें पर 271 रन्ज बनाए। ईशान किशन नै सभनें शा मते 103 ते कप्तान सूर्य कुमार यादव नै 63 रन्जें दी तूफानी पारी खेड्डी। परते च न्यूजीलैंड दी पूरी टीम 225 रन्जें पर सिमटी गई। भारत दी तरफा अर्शदीप सिंह नै 5 ते अक्षर पटेल नै 3 खड्डारिएं गी आउट कीता। ईशान किशन गी प्लेयर ऑफ द मैच घोशत कीता गेआ जिसले कि कप्तान सूर्य कुमार यादव गी इस पूरी श्रृंखला दा सभनें शा बेहतरीन खड्डारी दे पुरस्कार कन्नै सम्मानित कीता गेआ।

<><><><><><>

### Cummins-Ruled Out

आस्ट्रेलिया दे तेज गेंदबाज पैट कमिंस पिट्ट च सट्ट लगने कारण औंदे ICC T-20 विश्व कप शा बाहर होई गेन। एह टूर्नामेंट 7 फरवरी थमां 8 मार्च धोड़ी भारत ते श्रीलंका च आयोजित कीता जाहगा।

मिशेल मार्श गी उंदी थाहर आस्ट्रेलिया दा कप्तान बनाया गया ऐ। बेन इवार्शियस ते मैथ्यू रेनशा गी 15 मिम्बरी आस्ट्रेलिया टीम च शामिल कीता गया ऐ- जिसलै जे मैथ्यू शार्ट गी टीम शा बाहर करी दिता गया ऐ। आस्ट्रेलिया गी ग्रुप-बी च आयरलैंड- जिम्बाब्वे- श्रीलंका ते ओमान कन्नै रखेया गया ऐ। टीम 11 फरवरी गी कोलम्बो च आयरलैंड कन्नै अपना पैहला मैच खेडग।

<><><><><><>